

四庫全書

史部

欽定四庫全書

續資治通鑑長編卷二百八十九

宋 李燾 撰

神宗

元豐元年夏四月乙巳詔翰林醫官院選醫學二人馳驛給券往修閉決河所以上批塞河役衆闕醫治疾故也知諫院蔡確既被旨同御史臺按藩開獄遂收大理寺詳斷官竇革周孝恭等枷縛暴於日中凡五十七

日求其受賂事皆無狀中丞鄧潤甫夜聞掠囚聲以為革孝恭等其實他囚也潤甫心非確以為慘刻而力不能制確引陳安民置枷於前而問之安民懼即言嘗請求文及甫及甫云已白丞相甚垂意丞相指吳充也確得其辭喜遽欲與潤甫登對具奏充受請求枉法潤甫止之明日潤甫在經筵獨奏相州獄事甚微大理實未嘗納賂而蔡確深探其獄支蔓不已竇革等皆朝士榜掠身無完膚皆銜冤自誣乞蚤結正權監察御史裏行

上官均亦以為言上甚駭異明日確欲登對至殿門上使人止之不得前手詔聞御史臺勘相州法司頗失直遣知諫院黃履勾當御藥院李舜舉據見禁人款狀引

問證驗有無不同結罪保明以聞

實錄以此語繫之三月二十一日乙未按

御集乃四月三日下此詔又按司馬光記聞云竇革等初縛暴日中凡五十七日確自閏正月二十五日被旨赴臺至三月二十一日纔五十五日耳恐實錄誤又按上官均所言黃履李舜舉初赴臺驗問見禁人初無黃履姓名至四月三日改正李舜舉監勘乃別出黃履姓名蓋履及舜舉先赴臺驗問後又與廉同勘鞫其實兩事手詔自當再下增差黃履必須特降手詔而御集偶失編纂但得改正監勘手詔遂誤并兩事為一事故日

月差至若從實錄繫之三月二十一日則又似太早今但附見於此而不書月日庶不相抵牾記開亦誤并兩事為一事蓋不詳考履舜舉初止是驗問漆差黃廉則云勘鞠而潤甫等始獲罪其先後次序可推而知今擬

取刪

履舜舉至臺與潤甫確等坐簾下引囚於前讀示

款狀令實則書實虛則陳寃前此確屢問囚有變詞者輒笞掠及是囚不知其為詔使也畏吏獄之酷不敢不承獨竇革譌異驗拷掠之痕則無之履舜舉還奏上頗不直潤甫等言而均復言比奉朝旨鞠相州獄其法司潘開等所齎錢物別無行求處外有詳斷官竇革等初

議法不一後却依相州所斷及據革雖稱判大理寺朱  
溫其方議法次嘗稱樂咸是故人雖有理却不解說又  
言陳安民是李待制親誰敢妄定翻它文字語似涉私  
然推究革等本意正是疑惑刑名反覆議論即非主張  
樂咸陳安民始改斷前月十九日鄧潤甫蔡確欲先具  
情節奏御前一日潤甫與臣恐革等所通款狀或有異  
同即與勘官聚廳引問據革口說與元狀不同并稱綳  
縛五十餘日止有出入息便有死罪亦須通說又據十

七日元簽書官陳安民稱嘗託外甥大理評事文及甫  
說與宰相吳克告照管克亦垂意潤甫與臣以事連執  
政未追到及甫照證反據革所說與元狀不同不敢鹵  
莽進呈已具奏聞蒙差知諫院黃履勾當御藥院李舜  
舉赴臺案驗履等與衆官聚廳逐一引問見禁官吏百  
姓對定款狀潘開等三十餘人無訛異外有竇革稱元  
供狀內十有八事皆虛及詳斷官杜子民亦稱元狀嘗  
說陳安民見在政府上下經營一節亦不實臣者詳革

等初不曾受賂枉法今勘劾止緣議法有前語言其間  
雖似涉私亦無實狀致前後翻異不一兼據竇革累於  
勘所聲冤緣臣與潤甫初恐同勘官蔡確疑本臺私蔽  
官吏不欲面引問止據款狀簽押其蔡確日至臺止是  
呼召元辟同勘官劉仲熊及親信府吏楊昌等傳授指  
意日夜窮治及據推直官虞肇等稱初無指揮綑縛竇  
革必是劉仲熊楊昌等擅綑縛又蔡確取前月十九日  
同潤甫具情節進呈並不引官吏面訊虛實及親改奏



檢多漏逸情節欲以款狀上惑聖聽臣與潤甫久欲論  
辨緣所勘官吏語言多連及權要迹涉阿蔽亦恐蔡確  
藉此為說臣雖有區區之誠無由獲信然反覆思慮職  
在風憲義當彈舉避嫌不言退為身謀則是臣不忠不  
直上負朝廷設官任使之意臣欲乞除潘開等對驗已  
定止就本臺結絕外其法官竇革等干連命官乞別差  
官移司盡公根勘所貴推見情實不致冤濫翌日又言  
臣自與蔡確同鞠相州獄逾兩月觀其持法刻深言不

及仁窮治詰問不考情實以必得姦弊為事其所辟勘  
官劉仲熊天性陰薄憑恃確勢凌轢推直不容訊問臣  
昨日嘗於延和殿粗陳梗概不知陛下以臣言為信否  
夫大理審刑法令所繫所以持天下之平若官司挾情  
輕重其手此固人臣之所同嫉朝廷之所宜深治也况  
臣職在風憲義當彈舉安敢覆蔽有罪曲為游說又法  
官竇革等非臣親故所以拳拳不忘繼進狂瞽者誠以  
語言之間尤為難考必在參驗彼此以察其誠虛心審

聽以考其意誠意所之真偽斯得若逆其疑似而不究其情案其單辭而不參證左則所疑者未必非真所治者未必有罪也臣昨日親奉詔以竇革舞文變法湏追逮證左參考情實仰見陛下寬仁欽恤重刑之意書曰非佞折獄惟良折獄臣欲乞別差端厚明良之臣移司勘劾庶幾推見本末義不縱姦仁不濫罰有以副朝廷用刑之意如陛下必欲令蔡確兼領獄事亦乞止就本臺與臣等參治臣於蔡確雖無雅素然臣備官御史緣

確論薦不為無恩臣所以懇懇䟽辨愚不量力誠以其人峭深性寡忠厚若使獨領勘鞫而附以險薄小吏竊恐逼脅窮治不盡情款或及無罪伏望陛下揆之聖心參以朝論如確所存不如其言臣當伏妄言之誅以厲中外丙午四月三日詔確履及監察御史裏行黃廉就臺劾實仍遣舜舉監之

朱本簽貼云先帝遣李舜舉黃履按相州獄事可謂審實而信

錄書云履等下簾引問罪人不知為詔使也猶以為寬今取到黃履狀稱並當面引問罪人諭以朝廷遣詔使重行按問各令盡理供析罪人並無冤辭顯是舊錄誣罔改定云上初以潤甫均言故疑獄辭非實仍遣履舜

舉即訊履等同潤甫均至臺引問而履等論罪人以詔  
使審訊罪人卒無異辭今新本只用舊錄合從新本黃  
庭堅作黃廉行狀差同結絕相州獄事初相州事發於  
皇城卒事十九不實知雜御史蔡確鍛鍊成獄以此自  
謀中丞鄧溫伯御史上官均上疏論之溫伯又在經筵  
造膝而論確耳目長具得溫伯均所言又善伺察中人  
主意即論溫伯均朋黨為邪與罪人為地又任殘賊吏  
日引諸囚如使者慮問狀稱冤者輒苦辱之有人情所  
不能堪及上遣黃履李舜舉按獄而囚以為如前皆引  
服於是天子不疑確而溫伯均皆得罪均猶獨上疏爭  
之然廉至未幾而具獄上矣廉嘗謂子弟吾夫不極論  
此獄甚愧然上官御史也上官均後以此劾廉罷都承  
旨七月一日  
虞肇送審官 吳克言御史臺鞠相州獄連臣壻文及甫  
其事在中書有嫌乞免進呈或送樞密院詔免克進呈

及簽書候案上中書樞密院同取旨 提舉成都府路  
茶場司言秦鳳路副總管夏元幾用禁軍面易私茶侵  
壞茶法詔轉運司劾之 又詔大理寺行銓院案吏與  
增祿仍行倉法

丁未中書奏檢正吏房公事刑部員外郎向宗儒申請  
諸房有未便事一言大卿監以上隸中書少卿監以下  
屬審官惟奏薦則皆在中書施行況今武臣閤門副使  
以上奏薦則係樞密院諸司使以下並屬審官西院中

書密院事體亦當均一欲乞今後文臣奏薦大卿監以上依舊外少卿監以下並令審官東院施行所有合用條制即乞備錄頒降一言天下州軍務在選擇能吏故自知縣資序選充通判自通判選充知州者蓋朝廷獎拔人材以備任使謂之堂選既謂堂選則當自中書施行今堂選者却送審官東院本院會問動經旬月甚是迂滯欲乞今後堂選人並依堂除則例從中書取索會問施行以上二項欲並賜依一言制勅院舊例守當官行

遣本房文字守闕不預行遣其守闕料錢五貫文不預  
行遣稽違差失遇有恩賞與本行守當官一例被賜又  
諸房承例指射連簽行遣即添食錢五貫文顯見僥倖  
乞據見今守闕人數隨事繁簡分隸諸房悉令同行  
遣如此各務協心職事一言自來差官主判在京官司  
有正有權有權發遣而無定制且以尚書六曹言之惟  
吏部流內銓雖兩制並為權判其餘諸部皆無此例如  
京百司自兩制而下至朝臣並帶提舉顯見輕重不類



其餘寺監諸司率皆如此乞今後差官各依官職資序  
高下立為定式以上二項欲並令本房立法開奏從之  
仍以宗儒檢正五房公事候一年取旨與館職

實錄太  
畧今用

中書時  
政記

三司奏請預借明年陝西合得鈔錢百萬緡  
應副緣邊糧草內以十萬緡充買鈔本錢從之 提舉

成都府等路茶場李稷奏請賣茶以買馬而所賣茶價  
高下不一或能增不能減或知減不知增欲裁立中價  
聽隨市色增損仍定歲入課額及設酬賞格又言蕃部

無錢止以米及銀絹雜物賣錢買茶乞許博易銀米等

物立限半年易錢從之

時政記甚詳  
今止從實錄

戊申詔修完京城所差役兵五百石匠五十赴曾公亮  
墳功役以公亮葬期已逼而役事未集故也 提舉修  
開決口所奏集築隄道人力少乞在京備城兵內那三  
千人赴役半月可畢功從之

己酉遼主遣崇義軍節度使耶律永寧副使太常少卿  
乾文閣待制劉需來賀同天節 鄜延路經畧使呂惠

卿乞諸路緣邊城寨關官及管押兵馬緩急事宜差使並許經畧安撫鈐轄司於待關得替使臣至軍大將內權差勾當每月一具所差員數職位姓名申樞密院從之

庚戌詔以瀛州陳次米依災傷及七分例貸第四等以下戶不得抑配免出息 權發遣荆湖北路轉運判官馬瑊言體問山獍丁先鋒初因讐殺地客王聰其後沈大鼻等乘勢劫畧見今保險遷徙不常官軍難於追逐

臣已立賞招捕乞止令湖南差兵防截追逐赴本路出  
降詔荆湖南路安撫司曉諭強賊於北路投首仍多差  
兵丁防截如已在南路歸窮即安存奏取指揮

三月辛丑立賞

格是月辛酉降五月己丑處置七月甲戌推賞

上批昨差赴廣西戍兵據所

供帳狀已見其數不多兼代期月日不遠其近捕官員  
可更勿令前去縱彼暫闕部轄將校可差上名及十將  
等已下管押庶免盛夏遠道往反之勞 詔軍器庫使

兼翰林醫官使陳易簡等五人入內東頭供奉官勾當

御樂院李舜舉等四人各轉一官易簡與今年上路衣襖舜舉等四人聽寄資餘減磨勘年及與中下路衣襖共二十二人以上批近太皇太后服藥康復醫官內侍供奉有勞可推恩故也

乙卯右正言知制誥知諫院兼判司農寺蔡確為右諫議大夫權御史中丞翰林學士右諫議大夫兼侍讀權御史中丞鄧潤甫落職知撫州太子中允權監察御史裏行上官均責授光祿寺丞知光澤縣潤甫責辭云奏

事不實奉憲失中言涉詆欺內懷顧避均云不務審克  
苟為朋附俾加閱實不如所言先是上別遣黃履黃廉  
及李舜舉赴御史臺鞠相州法司獄確知上意不直潤  
甫等即具奏潤甫不悅推見陳安民請求執政情節責  
罵吏人均亦在傍憤恚見臣不與之同潤甫便行公文  
云未敢上殿次日却聞因進讀留身續又與均密自奏  
事不令臣簽書必以臣見其朋姦之迹恐臣論列故造  
飛語以中傷臣及欲動搖獄情陰結執政蒙陛下遣黃

履李舜舉詣臺審問潤甫與均於聚廳引問罪人處猶  
敢對使者交口紛紜意欲開誘罪人翻異而罪人了無  
異辭履及舜舉備見案潤甫等附下罔上情狀明白緣  
臣前任知雜御史有詔與潤甫共舉臺官臣素不識均  
因潤甫再三為言遂同奏舉均既蒙朝廷擢任而姦邪  
如此乞早賜罷斥上始亦疑相州獄濫及無辜遣使訊  
之乃不盡如潤甫等所言確從而攻之故皆坐貶確遷  
中丞凡朝士繫獄者確令獄卒與之同室而處同席而

寢飲食旋溷共在一堂置大盆於前凡饋食者羹飯餅

餌悉投其中以杓勻攪分飼之如犬豕置不問故繫者

幸其得問無罪不承

此據司馬記聞或移入斷陳安民等下上官均傳云相州富人子殺

人獄獄疑於審刑大理京師流言法官竇革等受賕知制誥蔡確引猜險吏法官數十人窮訊慘酷無敢明其冤均上疏乞以獄事詔臣等參治生是謫知邵武軍光澤縣革等卒無受賕之實天下服其持平舊紀書鄧洵甫勅詔獄詐罔不實落翰林學士罷御史中丞知撫州

三司言澶州闕糧乞權

借糧詔許於澶州封樁糧借給毋過五萬石

丙辰詔兩浙路提舉官增置一員判司農寺蔡確言兩



浙州縣戶衆多提舉司所管錢穀三百餘萬乞擇能吏倚以辦劇故也

庚申入內東頭供奉官熙河路都總管司走馬承受公事長孫良臣言聞夏人於漢界內掘坑畫十字立草封恐因循寢成邊事詔經畧司體量如實即令廊延路經畧司移牒誠約之詔知廣州曾布專提舉依所降法式修完中東西三城樓櫓詔諸權場除九經疏外若賣餘書與北客及諸人私賣與化外人書者並徒三年

引致者減一等皆配鄰州本城情重者配千里許人告  
捕給賞著為令 左藏庫使曹誌為昌州刺史以上批  
誌太皇太后從子特推恩也

辛酉知制誥錢藻孫洙並直學士院 三司乞罷在京

行折二銅錢聽畫出新錢從之 點閱淮南荆湖江西

福建將兵畢西上閤門使張山甫減磨勘三年差使指

使先次指射差遣餘賜帛有差 馬瑊言獯賊丁先鋒

等納木契乞降詔瑊如首領實願降聽收木契毋遣人

招喚

壬戌詔開廢田興水利建立隄防修貼圩垸之類民力不能役者許受利人戶具合費用數目貸常平等錢穀限三年兩料輸足歲去息一分詔西上閤門使忠州團練使韓存寶聽以減磨勘三年回授其母萬年縣君田氏進封仁壽郡君賜冠帔非有戰功如存寶者毋得援為例

癸亥太白晝見

甲子陝西路轉運司乞運河中陝府華州永興軍大錢三十萬緡與緣邊廣置軍儲從之 詔制勘院遣人就問太常博士吳安持特免追攝 河州請以城東北隅附山不食之地二項作墓園瘞蕃漢陣亡暴骸已擇僧看管修葺乞賜院額依太原府例二年度僧一人從之 仍以慈濟為額 詔太醫局選醫生十人給官局熟藥乘驛詣曹村決河所醫治見役兵夫

乙丑集慶軍節度使同平章事號國公宗諤為鎮南軍

節度使同平章事進封豫章郡王上批宗諤皇家近屬  
自除使相今十餘年頃雖曾以罪左降緣已經展磨勘  
年於法尚有殘零月日未該叙進可特與進一爵遷一

官也

兩紀皆  
書此

詔麟府豐州見欠熙寧七年至九年振

貸米人戶不以等第與展限分夏秋料納 又詔聞安

南行營軍有實染瘴逐隊不及死於路者多作逃亡注

籍深可矜憫宜令所屬考實具名以聞並依瘴死例推

恩 詔成都府劉庠配賊李玟不以常法特釋之

丙寅詔供備庫副使任遵子降一等推恩先是遵遇南郊乞補子班行年已七十中書擬送刑寺定奪上批與之與否非有司所宜決可從朝廷指揮降等推恩仍著為令 丹州言本州僻小惟管宜川一縣每有公事止於司理院當直司可以勘鞠乞併州院入司理院從之 詔定州望都縣自今罷武臣知縣差京朝官 御通英閣講官沈季長進講周禮小宰掌建邦之宮刑以治王宮之政令凡宮之糾禁上曰政令糾禁詳畧如何季

長對畢上曰言凡宮之糾禁則不止於王宮蓋又及於諸侯也

丁卯河東路經畧使韓絳言河外三州并緣邊堡寨未役功料甚衆全闕廂軍乞募禁軍修完從之仍令更刷本路廂軍及候澶州塞河役兵回併力修築如功料浩大即俟農隙更差雇保丁三司言太醫局熟藥所熙寧九年六月開局至十年六月收息錢二萬五千餘緡其息計倍詔監官光祿寺丞程公孫殿直朱道濟減磨

勘三年依條給賞自今二年一比較 詔熙寧九年進士諸科並依六年指揮試律令或斷案注官累試不中不能就試即滿二年注官

戊辰詔義勇保甲毋得應進士舉今日以前已習文業聽自陳本州試驗若堪取應即給公據落籍本家一丁提舉修閑曹村決口所言丙寅已塞決口詔改新閉曹村埽曰靈平遣樞密直學士陳襄祭謝仍以都總管燕達兼都大提舉修護務令堅實及遣中使撫問賜燕



達以下御筵役兵禁軍等特支錢有差靈津廟神濟夫  
人進封靈顯神妃初決口屢塞不能絕流財力俱竭達  
等相視無策有小赤蛇出於上流衆以為神共禱之一  
夕沙漲河遂塞故賜名埽曰靈平廟曰顯靈神妃殆非  
人力也

折舊紀於丙寅書塞  
決河名其埽曰靈平

西染院使任澤為皇城

使昌州刺史供備庫副使時君卿為宮苑使榮州刺史  
前此上批澤先帝舊邸近親君卿承學潛宮特被眷遇  
可並稍遷兼一遥郡於是並轉皇城使澤領團練使君

卿領刺史已而上又批翌日再進呈乃有是命 詔經  
任大小使臣無贓私罪聽召保官二人量試驗充武學  
外舍生以三十人為額累試合格乃得補內舍

庚午詔贈同判都水監司勲員外郎劉璿為刑部郎中  
官其一子賜絹三百匹以上批璿自擢置水官累任以  
事悉心公家凡以職事建明朝廷無不可者河埽流急  
晝夜躬親監護至於忘食重冒寒暑感疾不瘳深可惻  
憫可特優與贈官厚賜其家故有是命後河決塞又賜

帛五百

辛未秘書丞崇文院校書范育直集賢院以上批育數  
受命案事能以直道自持不為黨勢回屈而摘發姦慝  
多得隱伏情狀且今士人方以養私庇姦罔上為俗如  
育者賞豈宜緩故有是命 詔聞曹村雖塞決口水勢  
尚衝刷新埽其修河官吏議論不一莫肯任責若朝暮  
西山積雨下流愈難施功委范子淵集議宜如何即得  
斷流一面施行又詔新埽役兵疲於盛暑可三分日力

用二分全役一分與放半功當午大熱聽少休息

五月甲戌朔御文德殿視朝 是日曹村決口新隄成河

還北流自閏正月丙戌首事距此凡用功一百九十餘萬

材一千二百八十九萬錢米各三十萬隄長一百十四里

此據會要及  
靈津廟碑

濮齊鄆徐四州守臣以立隄救水城得不沒

皆降詔獎諭

四州獎諭據靈津廟碑必自  
有月日但實錄不書今附此

賜兵夫死於役者家

錢三千

新紀  
有此

經制熙河路邊防財用司請本路商販依秦

鳳路例打撲從之其入中糧草聽免先是熙河經畧司言

本路州軍皆新造其商貨已經秦鳳路所歷城寨收納打撲欲乞比秦鳳路三分減一詔依所奏而財用司以為商旅雖經秦鳳路城寨緣販物至極邊獲利甚厚兼逐司既嘗取中裁損毋得過稅錢則販家蒙利已多乞復收打撲依秦鳳路例又言昨以糧草闕乏結糴免打撲其後商人緣以為姦影挾私糴乞亦依例打撲故有是詔 詔權利州路轉運使司封郎中張宗諤轉運判官太子中舍張升卿各降兩官勒停初宗諤等乞廢茶場司止委轉運司收

茶稅歇馱錢而提舉茶場李稷言其所陳皆踈謬不實罪  
當無赦上批宗諤升卿踈遠小臣敢為欺罔如此犯雖該  
赦可特追兩官故有是命

宗諤等以去年九月庚午建  
請朱本并入此今仍兩見

乙亥詔試中刑法官第一等充法官第二等循兩資第  
三等循一資第四等堂除第五等免試京朝官比類推  
恩 又詔廣西轉運司官員使臣諸軍料錢等物願以  
其半折銀者聽 司農寺言諸路蠶麥豐熟乞下提舉  
司以積欠錢穀量增直折納從之 詔賜故著作佐郎

崇文院校書張載賻贈視館職之半以翰林學士許將等言載恬於仕進乞加優卹故也

己卯羣臣上表賀塞曹村決口河復故道

孫洙靈津廟碑可考詳

詔塞決河亡卒聽自陳免罪仍具被差急夫合如何

優卹其部夫官分若干等第以聞

戊戌分三等賞功

庚辰詔輔臣觀麥於後苑起復樞密直學士起居舍

人簽書本院事曾孝寬孝寬乞終喪許之給半俸又辭

從之詔熙河路鈐轄兼第二將四方館使李浩訓兵

精熟令再任 都大提舉修開曹村決口所言見修月

隄增卑培薄正須兵夫赴役候漲水定即依先鋒指揮  
分日力三分之一放半功承受韓永式言新修馬頭於  
大河傾注之間簽成隄岸河流雖斷隄面尚墊猶須衆  
力乞且留諸處役兵一月候馬頭不墊新隄增固委都  
大提舉所減放實選役兵萬人俟過漲水聽還並從之  
提舉茶場司言採茶及般輦州縣乞同轉運司選差  
知州通判知縣令及排岸官一次其彭漢知州或通判



許本司權奏辟如能協力保明留再任從之 詔聞在

京熙河路鹽鈔減價由遞牒濡滯以害鈔法其令皮公

弼根治 詔應有謁禁之官如士人通醫術者聽往還

勿禁 廣南西路轉運司乞令經畧司依朝旨移兵馬

於全永二州就食詔二州協心議事毋得乖異具移減

戍兵實數以聞 賜捕殺荆湖北路猛賊軍士土丁特

支錢有差

辛巳度支郎中集賢殿修撰知鄆州王克臣為天章閣

待制知瀛州 熙河路經畧使張侁乞舉文資一員準  
備差遣點檢常平錢穀從之

壬午詔塞決河役兵減放日賜特支錢有差 衛國長

公主長子張東淵授如京副使

當考例

經制熙河路邊

防財用司言準朝旨以土田分等近城第一等為官莊  
第二等合種第三等出租第四等募人耕五年起稅欲  
選附城沃土八百頃為官莊有餘募弓箭手又有餘募  
人合種及出租賦官莊每五十頃差治田使臣一員立

賞罰格從之

志有此六月十四日七月一日十月二十七日

給太原府度僧

牒二百買軍器物料 詔內殿承制符守臣先借拱聖

營官舍更許居十年以守臣懿德皇后家故也

甲申上批聞福建兩浙有舊販高麗海商知朝廷遣使爭謀以輕舟馳報規求重賂其下逐路監司覺察之依編勅私販新羅法許人告捕送五百里編管

乙酉詔械走投漢界北人王善及其妻子蒙塞耳目至代州牒送北界以上批緣邊所收西北界闌遺人口當

送還者並蒙塞耳目勿令有所聞見故也

丙戌詔中書門下奏檢正五房公事覆考到試中刑法  
出官人上一人循一資堂除差遣中等稍優上一人  
循一資下三人各堂除差遣餘推恩有差從之 詔諸

路州軍並差官一員管勾常平錢穀十縣以上二員分  
治即廣南無通判職官州軍委知州管勾其下縣點檢  
給納聽以曹官或知縣代之 觀文殿大學士左僕射  
集禧觀使王安石依知大藩府例給添支 熙河路經

畧司言洮東安撫司申據蕃部密報蕃部鈐轄崇儀副使趙紹忠陰與董戩文字往來乞移近裏州軍詔押赴秦州經畧司知管毋得縱令出城

丁亥詔權及權發遣省府推判官及職司等職任除依本資序奏薦外請給錫賜並依正入資序例 詔以開封府界戶絕田二十頃賜曹利用家自今毋得更有陳乞以其孫內殿崇班宗與言仁宗察知利用非罪嘗還其已沒財產尚有在京屋租河陰滎澤等縣田為西太

一宮洪福奉先慈孝等寺常住及入左藏庫金銀雜物  
乞盡給還故也

廊延路經畧使呂惠卿奏以本路兵  
馬分為九將用將副凡十八人其十三人已被宣差餘  
五員尚闕今乞以左侍禁閤門祗候胡靜等五人充上  
批靜舉止輕易不可委以將領下惠卿別具名以聞餘  
從之

戊子上批皇后弟禮賓使榮州刺史向宗回可特增差  
權羣牧都監禮賓使英州刺史向宗良增差勾當三司

衙司德妃苗氏賢妃周氏美人張氏乞遇同天節比婕妤等賜骨肉冠帔詔婕妤賢妃各五道美人二道著為令

己丑詔應南茶輒入熙河秦鳳涇原路如私販蠟茶法其巡捕如川峽茶入禁地法 又詔京東東路提點刑獄司依舊居青州割齊州屬東路徐州屬西路 賜度僧牒千付涇原路安撫司鬻錢封樁 荆湖北路轉運判官馬城言至辰州問知猺賊首帥與其黨總六十七

人丁先鋒雖已乞降猶於道路攘奪乞處置及辰沅州見禁徭人柳踏雪等三人雖是賊黨緣與徭人偵事及投火作過乞送遠州羈管詔踏雪等並杖脊刺配沂州等處餘令第等具唱率或同謀者以聞後城以四等具其罪輕重詔上兩等於辰州第三等於叙浦縣羈留各支口食差人監視候輕恩取裁餘發遣依舊

庚寅光祿寺丞陸佃修定說文

三月六日差王子韶  
五年六月九日書成

詔常平錢穀願以穀及金帛準市直中價計二分息折



納者聽

閏正月七日已用本志增入此  
或可削或移彼附此更詳之

詔陣亡并安

南病死軍士聽其子孫弟姪年二十以上一人充填本  
軍內戰亡之子年十五以下病亡之子十五以上並半  
支請受紐計三年總數折絹仍給公憑令隨便俟及十  
七赴官自陳量材依招軍收刺 詔西河路蕃官等願  
以請受易茶綵者聽

壬辰詔禁軍排連自今以三分為率一分權收立功額  
外人二分依條簡拍以樞密院兵房言者詳排連取功

勞并教頭諸武藝人數不一若將別指揮立功額外人  
取填一半慮妨本指揮有功及年勞武藝之人轉補故  
也 提舉茶場司言歲運官茶四萬馱饋邊常患輦送  
不繼欲以本司頭子錢置百料船三十隻差操舟兵士  
六人軍大將一人管押歲終比較如年課辦比陸運省  
便即計所贏以十之三賞軍大將等有損壞遺闕以賞  
錢請受備償從之

甲午詔宗室袒免以上女與夫離而再嫁其後夫已有

官者轉一官 中書言奉詔選人祿以戶田定數令吏房立法雖約主戶數以為增損恐未盡天下繁簡之實欲令逐路轉運提點刑獄提舉司同約州縣繁簡分三等至五等以聞乃隨等定俸從之後不果行

乙未提舉茶場李稷言三路三十六場大小使臣殆及百員乞不限員候三年茶法就緒取裁

丙申詔贈廣陵郡王宗誼子仲論仲證候服闋依康王宗樸例各轉一官 校書郎邵堦言父亢遺表乞賜出

身詔改堽一官 前守化州文學趙世卿進安南邊說  
五篇及自陳安南戰棹司差使有功詔世卿與正官注  
荆湖南路主簿

丁酉詔差待闕得替官權住俸員闕者支本任俸給若  
朝廷泛遣以等第給添支食錢餘官司依條牒差者惟  
給食錢以上選人止給前任請俸即未經任者依資序  
戊戌入內東頭供奉官請永式轉兩官聽寄資其保明  
勞績優等轉兩官第一等減磨勘二年選人改合入官

第二等轉一官選人循兩資第三等減磨勘三年總管及轉運司各第減一等其靈平埽都大提舉及巡河等官滿日酬獎論塞決河之勞也 三司言自今宗室嫁娶資送錢物乞令入內省及大宗正司各置都歷每有支遣以千字文立為號注歷印押付使臣往庫務驗認給請以為關防從之 詔慶州制勘命官再問不承聽追攝先是遣范育詣慶州劾蕃部事奏乞初問不承即攝上批宜改作再問憫之也 又詔知慶州刑部郎中

直龍圖閣范純仁奪職知信陽軍永興軍路鈐轄客省  
使种古追一官知寧州比部郎中史籍追兩官並勒停  
知環州內藏庫使种諲免追官勒停罰銅二十斤環州  
簽書判官黨師經以下三人衝替一人差替純仁坐不  
追捕作過熟戶蕃部古虛訟純仁不公諲為其兄發奏  
狀入馬遞籍申制院不實師經等推勘簽書劫盜公事  
失入故也

熙寧十年八月壬午朔遣馮如晦鞠獄已具  
注在彼并秦觀序合參照純仁言行錄云鄜

延帥陰奏純仁擅回宥州牒有違慢情罪坐是謫信陽  
即鄜延者呂惠卿也當考閏正月丁酉上批更詳之

上批交人進奉赴關緣今來入寇之後理當羈防其緣路及到關出入當差人監視等事可下廣南西路經畧司及在京押伴所速具以聞內緣路事有奏稟不及委經畧司一面施行

己亥詔權河北轉運副使祠部郎中王居卿權發遣河北東路提點刑獄汪輔之各減磨勘三年賞應副河事畢也

辛丑手詔日者廣西凡有邊事動至五六處交奏不惟

過涉張皇深慮緣路習為常事或真有邊機當速者反致遲滯可速下轉運提點刑獄經畧邕州安撫都監司自今後非緊切邊事毋得擅發急遞及經畧司已奏者不須重複如逐司自有所見及經畧司處置未盡不拘此令 管勾河東緣邊安撫司劉舜卿言北界西南面安撫司自去秋因移文索姦細人李福壽等妄指占瓶形寨地至今春以來漸以人馬並邊出入臣竊料北人覬覦不過欲蹂踐苗稼或強占地域重立鋪屋以騷疆



陸欲止作本處意詳度事勢支吾不至一一申稟以失機會從之 詔修河所減放諸埽河清客軍並歇泊十日如河防緊急入役即令向後補之 詔右武衛大將軍象州刺史克頌貸死追毀出身以來告勅鎖外宅坐病狂毆傷妻劉死故也知宗正丞趙彥若言據仙源積慶圖克頌秦王廷美曾孫紀國公德存孫河東郡王承衍子在今為三從外無服之親名銜不當稱皇叔廷美十子各有封國子孫繫屬自存本統克頌合稱紀國公


孫謹按禮記曰君有合族之道族人不得以其戚戚君位也鄭氏注族人皆臣也不得以父兄子弟之親自戚於位謂齒列也所以尊君別嫌唐有司奏宗子皇字為稱首從數為序親誠非不戚君位之義儀禮從父昆弟則今同堂也從祖昆弟則今再從也族昆弟則今三從也三從內請依舊餘各以祖稱本封為某王公子孫此則唐之皇親三從內於皇字下有從及再從及三從外則不書皇各以其祖先所封為房冠於頭銜周小宗伯

掌三族之別以辨親疎漢宗正叙九族其制一也今宗室文書行於曹局銜位之上雖三從外亦無從數非所謂叙也親疎一概不異其文非所謂辨也臣以為骨肉之恩固在敦睦然上下名分不得不正且有有司之事豈可使天旨自親其文是乃臣之責任所當守職而論也伏願據宗藩慶緒錄悉正其名應同堂親於皇字下加從字再從三從又加再三字三從之外各以其祖先所封郡國為房分而系其世次不書皇字則親疎有別

尊卑不黷又伏見本朝宗室舊有名試出身之令熙寧  
初始命宗子出補外官分釐事任列於有職之臣此誠  
天下至公盛德之事加以恩澤涵育宗英衆多當此之  
際有司不能宣德明恩建白所職請廣選舉以少佐當  
寧勤求之意昔漢之取人不限疎近而宗正有郡國歲  
計上籍之文劉向以宗室高才進對待詔唐宗正寺歲  
選進士二十人與國子監京兆府相比李程李肱皆為  
舉首雖復嗣周而下去聖已久未可以論當世然取其

稍近古者或可施行今宗正寺侍祠之外專掌玉牒屬籍而不豫薦士在於聖時竊恐臣之本職有所未稱謂宜具為條流俾諸教官依國子監外官學例為課試法每遇秋試許就宗正寺投狀鎖試別立人數頗示優異著於格令俾其競勸賢戚並用紀綱四方何獨棧樸之雅乎凡天下事皆如權衡重於此則輕於彼矣宗室之間自有考較賢者獲升不肖自抑一切之愚分當裁損必無缺望夫親賢兼進布列中外以鎮安四海為磐石

之固與愚知混淆聚於一處徒殫祿廩而無所事者不  
可同日語也事雖不行時論是之朱本簽貼云趙彥若  
所言無取亦無人稱  
之乃是前史官黨人故載於此又稱時論是  
之顯出私意刪去新本已復存之今從新本





# 欽定四庫全書

史部

續資治通鑑長編卷二百九十一

詳校官檢討

臣

劉錫五

刑部郎中

臣

許兆椿覆勘

纂修官修撰

臣

黃軒

謄錄監生

臣

黃琮



欽定四庫全書

續資治通鑑長編卷二百九十

宋 李燾 撰

神宗

元豐元年六月癸卯朔日有食之 權知邵州侍其璿

言扶竹水山獐梁義等願附招納籍為省民隸邵陽縣

輸丁身錢米詔荆湖南路安撫司問義如不願往湖北

即邵州安存之

兩紀附錄未並  
稱扶山竹狂

京東體量安撫黃廉

言澶州及京東河北淤官地皆上腴乞募客戶依其土俗私出牛刀官出種子分收選曉田利官兩員詣京東河北計會轉運提舉二司及遂縣令佐相度招募客戶自今秋營種并下司農寺詳定條約從之令轉運司選官係牧地即令提點刑獄司選差

甲辰夜東南有光燭地大星出匏瓜裂於內階聲如雷

新舊紀並如此書

乙巳詔太常博士苗師中供備庫使朱仲立等二十三

人名遷一官以與塞決河有勞故也 河東經略使韓

絳言麟州銀城寨熟戶蕃部命資允入西界刺事為戎人所獲其子瑪克密已補十將今資允逃歸乞與近上名目免追瑪克密恩命詔補資允十將瑪克密免追奪 詔熙

州增築西南外羅城漸置樓櫓凡役兵夫四十四萬以經制財用局言熙州為一路根本漢蕃民居及軍營寺觀並在城外無所障護乞因西南壁舊羅城基增築并女牆高三丈故也 荆湖北路轉運司言交人進奉赴

闕慮雇人夫不足乞優估價雇錢差借從之自今經歷  
路分並準此 潁州團練推官武學教授蔡碩為大理  
評事展磨勘二年碩供職叙考當遷次等京官以嘗姦  
雜戶故有是命

丙午以同知禮院太常丞館閣校勘劉摯為集賢校理  
詔牧地租課諸路委提點刑獄開封府界委提點司  
催納每年秋料限滿次季具納欠數上羣牧司任滿無  
欠不及二分令本司保明取旨即及三分以上者並奏

劾 又詔權都大管勾巡護惠民河楊琰令任滿日再任賜度牒五十琰自陳以夏津縣決河故道為大河塞曹村決口省人功物料錢百餘萬緡又五埽退背減罷使臣五員乞恩故也

丁未樞密院言副都承旨西上閤門使榮州刺史張誠一當磨勘詔誠一係副都承旨特與轉遙郡團練使餘

依舊

密記

己酉梓州路轉運司言討伐瀘州納溪夷賊已準詔俟

秋初進兵今除首惡未獲外見有獻納器甲降人甚衆  
若須用兵平蕩卽未委如何分別當討捕之人合用錢  
糧於何處應副作幾軍分路入討詔鈐轄轉運提點刑  
獄司同議利害以聞先是瀘州江安縣納溪寨居民蘇  
三十七與羅苟夷人目特意爭魚苟誤毆殺之夷訴於  
寨寨聞於縣縣行檢驗之法夷情忿怨謂漢殺我人官  
中不肯償我骨價又暴露我夷人屍首呪詛累日因聚  
衆入寇瀘州出兵備禦寨將馬仲通素懦棄寨出奔夷

人遂乘勢焚掠寨南岸人畜廬屋殆盡轉運使高秉判  
官陳之才共奏夷人近歲畏服不敢犯漢一旦狂悖若  
此今不治必為後患乞以本路兵問罪朝廷既許之秉  
之才復具事宜以請乃降是詔

納溪用師實錄正史俱  
不詳今取宗安國元豐

平蠻錄附益之七  
月二日差韓存寶

京東路體量安撫黃廉言本路被

水之初乞委監司察災傷縣令不得力者聽於不經水  
災若事簡縣對移如闕人即於得替待闕人不依常例  
奏舉及乞申勅有司檢計溝河候豐熟令所屬調丁夫

濬治梁山張澤兩澌累歲填淤浸民田亦乞自下流浚  
至濱州從之開濬溝河令都水監遣官同轉運司檢視  
工料

廉受命安撫京東在  
熙寧十年八月九日

詔河北路轉運司昨發塞

決河急夫候發春夫計日折免更蠲五分

辛亥詔提舉茶場司于闡進奉使人買茶與免稅於歲  
額錢內除之

癸丑以前權發遣荆湖北路轉運副使太子中允集賢  
校理徐禧同知諫院兼管勾國子監 同提舉成都府



等路茶場蒲宗閔言乞依李稷劾官吏詔宗閔與理轉  
運判官資序所舉京官縣令及使臣陞陟比稷所舉人  
三分之聽舉其一分其州縣官吏於茶場司職務有違  
亦許案劾 詔武學上舍生在學一年不犯第二等過  
委主判同學官保明免解從上毋過二人內於貢舉法  
自應免解及已該免解後更又在學二年以上無殿罰  
免閣試

案此條文義未  
明疑有脫誤

甲寅命輔臣祈雨 知鎮戎軍張守約言張義堡四面

受敵易攻難守堡南一里有舊堡三面臨崖城兩重皆  
不受敵乞存新堡外更修葺舊堡移置倉草場及見任  
監押令管勾上下兩城兵馬煙火遷廨舍於舊堡從之  
乙卯上批靈平歸役兵冒暑工作極為勞苦賜特支錢  
有差又批修河所減放役兵多道死者深可憫惻宜指  
揮專委逐路提點刑獄官一員點檢催督早令達住營  
州軍

丙辰詔提舉官自今與轉運判官以資任相壓同者序

官其添給當直接送人船遞馬兵士並依轉運判官例  
經制財用司言熙河路弓箭手昨準朝旨四人同治  
官莊一項頗聞困于役使致闕二千人欲罷四人治田  
指揮惟收成時聽暫應副外餘毋得役使兼秦鳳路轉  
運司綱運所兵級已詔隸本司乞勘會元額下陝西轉  
運司簡廂軍投換以充治田如不足益以選中保寧兵  
從之

七月一日十  
月二十七日

上批聞近畿路有苦雨處令轉運

司委長吏禱名山靈祠及令開封界提點司督諸縣開

畎積水具退出民田次第以聞京東西路州軍委轉運  
司施行

丁巳權都水監丞趙子淵言乞於汜水鎮北門導洛水  
入於汴為清汴通漕以省開閉汴口功費詔候來年取

旨

十二月六  
日可考

己未詔都水監應河埽物料於合應副路轉運及開封  
府界提點司取三年中一中數為額委逐司管認應副  
錢物關本監計置

庚申著作佐郎直集賢院范育為太子中允檢詳樞密院兵房文字 殿前都指揮使安武節度使郝質卒車駕臨奠贈侍中謚武莊

辛酉詔滄州清池莫州任邱霸州文安大城秦州成紀隴城清水延州膚施延長延川慶州安化合水全州清湘灌陽邵州邵陽武岡澧州石門慈利十八縣自今委三班院選差使臣為尉其舊係使臣監當關送流內銓差注 詔殿中丞陳安民追一官勒停展三朞叙太常

博士吳安持追一官免勒停銜替前檢正中書刑房公  
事劉奉世落直史館免勒停監陳州糧料院詳斷官竇  
革追一官勒停詳議官周孝恭大理評事文及甫並銜  
替安民嘗官相州坐與失入馮言死罪屬及甫言於宰  
相吳充安持坐令及甫屬以諭奉世奉世坐諭法官令  
指定不須作失入革孝恭坐定為非失入其牽連得罪  
者又數十人充釋不問周清遷一官初蔡確勘是獄欲  
鍛鍊以傾充既為中丞遂收繫及甫及甫懼即如安民

前欵稱嘗白充充諾之且稱嘗屬充子安持確又收奉  
世奉世先為樞密院檢詳充自樞密使拜相奏奉世檢  
正中書充雅信重之確令大理官吏稱受奉世風指欲  
出安民罪奉世懼亦稱於起居日嘗受安持屬確又欲  
收安持詔第令即訊安持恐被收亦稱實屬奉世時三  
司使李承之戶部副使韓忠彥皆上所厚忠彥琦子而  
承之嘗為都檢正確皆令囚引之承之知之數為上言  
確險陂之情上意稍解趣使結正於是獄成忠彥猶坐

贖銅十斤充上表乞罷相及闔門待罪者三四上趣遣  
中使召出令視事確屢率言事官登對言罪安持太輕  
上曰子弟為親識請託不得已而應之此亦常事何足  
深罪卿輩但欲共攻吳充去之此何意也以確所彈奏  
劄還之言者乃已

墨本云獄成人以為冤朱本削去今詳述其事則冤狀自見矣

癸亥馬軍副都指揮使昭信軍留後賈逵為殿前副都  
指揮使建武節度使

舊紀書此

詔應內外臣僚昨舉才行

堪升擢官令中書審察人才取旨



甲子同提舉成都府等路茶場蒲宗閔言本司元依客例買解鹽入川變轉茶本不禁私販後劉佐權賣遂致人言及因解鹽司申陳盡從廢罷伏詳朝廷止絕本司賣鹽之意慮妨商賈而害鈔緣解鹽法弊在出鈔過多乞除劉佐權法不行外許依舊施行詔李稷相度以聞乙丑李稷乞定成都府利州路茶場鹽官買茶無雜偽麤惡替罷委提舉官保明滿五千駄與第五等酬一萬駄與第四等每一萬駄第加一等若買麤惡偽濫雜茶

估剝計所虧坐贓論同監官賞罰聽減一等即徒罪不至追官者並衝替其賣買食茶依收息給賞從之上批河東路置備兩九軍兵仗近韓絳累奏有申明陳乞事如有未報可者可趣行下

丙寅命太子中允秘閣校理同知諫院徐禧計議環慶等路措置邊防事

七月十九日辛卯明年三月十四日癸未十七日丙戌可考

詔

應教閱軍員有能部轄及曾經驅策幹辦各有膽略堪統領陣隊者委管軍臣僚及路分總管鈐轄都監及州

總管鈐轄將副各歲舉樞密院類聚注籍遇須人才任  
使以被舉重者取旨錄用 知將作監主簿王古言去

歲詔講復義倉試於畿邑已不擾而可行欲乞於豐稔  
路委提舉司勘會省稅常平免役等錢穀欠闕共不及  
三分處先推行庶幾數年之間即見成效詔京東京西  
淮南河東陝西路依開封府界諸縣行義倉法餘依奏

仍以今年秋料為始

本志云將作監主簿王古言義倉之法試於畿邑已見不擾請下提

舉司視諸路稅役錢欠闕不及三分者先推行之乃詔京東西河東陝西淮南路立義倉如畿縣法八月八日

已酉所載路分先後不同當考

詔京東東路民訴方田定驗肥瘠未

實處並先擇詞訟最多一縣據名色等第酌中立稅候

了日無赴愬即案以次縣施行

七月九日

丁卯荆湖北路轉運司言沅州屯田務自初興至今所

收未嘗敷額若募人租種納課不費官本利害甚明乞

朝廷詳酌施行及令本州通判管勾月糧給食錢從之

委轉運判官馬城提舉

熙寧七年四月十九日初置沅州元豐二月七月二十一日罷

屯田務

詔諸路都作院委樞密院選差本路提點刑獄

官一員提舉點檢

戊辰鄜延經略使呂惠卿言宥州牒稱麟府二州邊人  
侵耕生地乞降回宥州牒本詔管勾麟府路軍馬高遵  
一等驗定西人所爭地界舊曾與不曾開耕係與不係  
兩不耕地速保明以聞

庚午分命輔臣祈晴于郊廟社稷 著作佐郎何正臣  
為太子中允權監察御史裏行正臣新淦人也

辛未權發遣福建路轉運使屯田郎中直史館寒周輔

并提舉本路鹽事先是周輔言奉詔相度鹽事欲令上  
四州募人充鋪戶官給印厯請鹽分賣減其價直移南  
臺倉於水口鎮增巡防兵選捕察之官私販者交易引  
致停藏負載之人不以赦前後三犯杖皆編管鄰州已  
編管而再犯者配本城禁其般運雜和之弊嚴保伍捕  
告之法從之

周輔奉詔相度在熙寧十年八月二十九日食貨志熙寧十年福建盜廖恩聚黨掠

州縣恩既平御史中丞鄧潤甫言閩粵山林險阻連亘數千里無賴姦民比他路為多大抵盜販鹽耳恩平遂不為備安知無躡恩之迹而起者乃詔福建路寨周輔度利害以聞周輔言建劔汀州邵武軍官賣鹽價苦高

漳泉福州興化軍煮鹽價賤故多盜販賣於貴處異時  
建州嘗計民產賦錢買鹽而民憚求有司徒出錢或不  
得鹽今請罷去頗減建劍汀邵武軍鹽價募上戶為舖  
戶官給券定月所賣從官場買之如是則民易得鹽盜  
販不能規厚利又稍興復舊倉選吏增兵立法若盜販  
知情囊索之者不以赦三犯杖編管鄰州已編管復犯  
杖配犯處本城皆行之歲增賣二十三萬餘斤而鹽  
官數外售者不與焉元豐三年賈青云云具本年

前國子博士陳士儒毆婢婢逃且告士儒及其妻李與

聲婢共害其母張詔開封府鞫之士儒執中子也

據呂公著

家傳士儒獄是月就開封府鞫明年正月己卯改送法寺

復鄧州方城鎮為縣隸

唐州置南平軍南川縣割通遠軍濟揚堡隸岷州

此據實錄

八月又書復方城縣誤也舊紀但書置南川縣割濟陽堡事密記二十六日所載甚詳

秋七月癸酉朔主客郎中鄭民憲特陞兩任以民憲前

任經畫熙河路營田等有勞也

五月九日六月十四日十月二十七日

手詔御史臺有定奪刑名及承詔治獄皆有司所不能

決者承屬須得人乃以弼佐官長副朝廷欽恤之政其

推直官虞肇馮如晦年齒衰遲資性疲奐不足稱辨職

事可並送審官東院令本臺舉官以聞

虞肇見四月二日相州獄

詳定禮文所乞罷南郊壇天皇帝設位詔弗許又言



古者帝牛必在滌三月所以致其嚴潔通誠於神明也  
今既無滌宮繫養之法每於祭前三月市於民而有司  
滌養不嚴一切苟簡欲下將作度修滌宮具繫養之法  
飭所屬官司省視委太常寺主簿一員閱察從之

兩紀並書

立南郊滌宮

又言古之祭祀必具五齊三酒今樽罍一以法

酒實之是名物徒存而亡其實也謹案鄭氏釋五齊三  
酒各有名色尋呼酒工諭以大略工人稱可以約古醕  
造乞送所屬施行詔止令法酒庫內酒坊以見造諸酒

實之

二年八月戊午改酒齊法

甲戌詔以西上閣門使忠州團練使涇原路總管韓存  
實都大經制瀘州納溪夷賊公事仍於渭州及涇原路  
選下番土兵五千內馬軍一千及差經戰鬪使臣二十  
員隨行務在殄滅自來屈彊村圉俟賊衆痛懲剪戮懾  
威勾命即許自新如有軍馬未集以前請降村圉即令  
點集強壯自備器仗隨大軍討賊或勾集不從即除老  
小婦女外盡殺之應本路兵馬並聽存實節制其糧草

錢帛委高秉程之才隨軍計置不得預軍事

秉之才奏請具六月

六其提點刑獄穆珣令歸本司如韓存寶未到但嚴設  
隄備毋得輕易出兵先是珣言納溪寨去瀘州纔三十  
里而羅苟村夷賊在寨之西南不及五里八姓五十餘  
村夷族千戶內近漢之地稍平於進兵為易其後則林  
箐深阻難以嚮邇皇祐中嘗出驚劫殺傷官兵跳梁踰  
年乃乞打擔令又託事起端燔燒民舍輕侮官軍乍出  
乍沒以伺邊隙昨雖時有夷人乞降然夷情狡獪未可

取信邊人驚惑未敢復業近準諸處關報朝旨令招安  
將婉順開諭夷人以見收捕蘇三七根究施行毋得復  
為寇此見陛下聖度包荒文德柔遠天地大仁不較蚊  
蟲之毒而愛念元元至深至厚也然而醜類凶悍不識  
恩信輒復烏合蟻聚侵逼納溪鎖水若不加誅以絕後  
患則烏蠻生界觀望為害不細臣愚欲望出自宸斷遣  
親信之臣授以睿筭俾專處置行營軍事而轉運鈐轄  
同經制仍於陝西路就近差神虎保捷等五七指揮以

備呼使然後極其巢穴殲厥種類據險要以立堡寨籍  
保伍以教耕戰使被邊諸夷竭蹶聽命而烏蠻遠徼聞  
之莫不破膽誠為上策時梓夔路鈐轄王光祖先統所  
部兵屯瀘州亦奏乞陝西兵故以命存寶

新舊紀并書  
存寶經制納

溪夷十月辛亥十  
一月甲申奏功

知沅州東西閤門副使謝麟為引

進副使辰州都監西京左藏庫副使孫懷用為文思副  
使以斬捕猺賊及受猺賊丁先鋒等納木契投降有勞  
轉運判官馬城保明以聞故也於是城亦降勅書獎諭

賜銀絹各五十使臣以下轉官減磨勘年選人循資軍士土丁轉資賜銀絹各有差陣亡仍支孝贈命官軍員與其子恩澤防拓土丁賜錢存恤其家

三月辛丑四月辛酉五月己丑

皆合  
參照

丁丑開封府言定奪昭憲皇太后家大禮恩澤當自長子審琦直下子孫仲容始詔杜仲容與三班借職自今大禮推恩準此以如京使權廣西鈐轄張之諫為熙河路鈐轄以之諫自陳母老久病在甘谷城無供侍乞

移陝西故也

尋差知順州

上批聞蜀中用兵多無賴不逞

舉人干請將官以求効用妄希功賞令轉運司及韓存  
寶毋得以一人往 詔三班奉職劉富特轉右班殿直  
初客省申富齎詔賜真臘國王及管押本國貢物上京  
中書初未嘗擬賞而令客省發歸本路上批昨朝廷以  
交蠻犯順令廣州選募富往真臘國宣諭聞往來海上  
亦頗勤勞可量與酬賞候有保明至別取旨至廣東經  
略等奏至故有是命 詳定禮文所言舊南郊式車駕

出入宣德門太廟櫺星門朱雀門南薰門皆勘箭熙寧  
中因參知政事王珪議已罷勘箭而勘契之式尚存春  
秋之義不敢以所不信而加之尊者雷動天行無容疑  
貳必使誰何而後過門不應典禮考詳事始不見於開  
寶禮咸平中初載於儀注蓋當時禮官之失伏請自今  
車駕出門罷勘契從之 詔奪新授西京左藏庫副使  
楊中廣轉官勅告初中廣以管勾隄堰部役遷官至是  
知其部役河上多以疾在告不當預賞故也其都大提



舉修河燕達等保明不當特釋之又詔開封府國子  
監舉人並通取解額併試其諸州不滿百人者委轉運  
司取近便州各用本處解額就一州考試

庚辰詔前福建轉運副使職方郎中徐億追一官免勒  
停今致仕前知福州司封郎中直龍圖閣元積中落職  
駐泊陳德用巡檢張永等八人並追一官衝替免勒停  
坐廖恩驚刼措置乖失及不襲捕故也環慶路經略  
司乞以本司及常平錢帛乘秋成廣糴如將來別無支

用卽依糴價兌與轉運司從之

辛巳命西上閣門副使張山甫入內東頭供奉勾當內東門司馮宗道同案閱京東西將下馬步諸軍武藝以上批依開封府界例特差故也 詔永興軍等路提舉

司據未經方田均稅縣分并已經方田因民被訴曾差官定奪委實不均縣分如夏熟秋苗滋茂可見豐稔次第卽一面依方量均稅條差官體量訖前期一月申中書取旨

六月二十四日

又詔故西天譯經三藏鴻臚卿日成

賜謚曰闡教仍依法護例遺恩度僧七人惠辯院歲增  
度僧一人 詔自今諸寺監丞差通判以上資序人如  
係知縣人即充主簿權發遣丞事 上批鄜延路新團  
諸將及分定守禦堡寨所關器甲什物係軍器監轉運  
司應副者宜指揮自經略司申牒到限半年內應副

癸未判司農寺蔡確請令三局丞主簿不妨職事兼刪  
修本寺條例從之 詔河東陝西經略司指揮緣邊城  
寨探刺夏人過設備豫以上批秉常始親國事今秋點

集甚嚴又廊延麟府界間有遊騎出沒羌情難測戰守之具宜早有分畫故也 詔鎮安軍節度推官知澶州衛南縣李夷白循一資以靈平埽闕草夷白市十餘萬束應用都水監乞優與推恩中書擬理為勞績而上批夷白所買草數不足多賞然聞濟一時急用實為有功可特循資

甲申詔諸路轉運司就廨舍所在州置斗秤務委都監管轄依省樣造作別差官較定分送諸州商稅務賣之

如買出輒增減及私造行用者各杖一百 贈皇城使  
路慶孫妻霍乞追減長子志明一官與壻鍾敏詔以慶  
孫死事許追志明左班殿直與敏三班差使

乙酉詔諸路轉運及開封府界提點司椿管闕額禁軍  
請受令遂司更不問見管兵數有無少剩止據元額月  
給錢糧委提點刑獄及府界提舉司拘收於所在分別  
椿管其見銷減未盡合廢兵級即復於上件錢糧內支  
破歲終具數申樞密院

己丑命樞密直學士提舉中太一宮孫永監修刪潤齋  
醮科儀 知河陽兵部郎中集賢院學士鄧綰為龍圖  
閣待制知荆南

庚寅知禮院大理寺丞集賢校理曾肇兼修國史院編  
修官肇奏臣史學不如臣兄鞏乞回所授不聽 詔三  
司勘會江南西路轉運司如去年糧綱起發已辦宜免  
折變現錢外仍下發運司具析於六路數錢不均及併  
差官在江南西路剗刷因依以聞初有旨聽發運司據

逐路未運糧百萬石折變見錢而江西轉運司訴以年額轉漕已足兼朝旨令於六路均折變而發運司乃獨數本路以六十萬石又別遣官起本路見錢靡有了遺違編敕量留準備糴置三年芻糧之法故有是詔究竟何如

又詔廣西提舉司應桂昭賓象梧藤龔潯貴橫等州昨運糧充夫之家第一第二等以上更放一料役錢二分第三等放一料五分第四第五等以下全放兩料

辛卯詔自今武臣遙郡以上乞分司如歷任不因戰功

轉官及不曾任管軍及橫行並除南班官分司 詔澶  
定州大名府封樁草計置久未畢可令大名府通判馬  
獻卿澶州通判梁彥明定州通判楊景芬計會元計置  
官以未足數及時糴買仍令逐路安撫司催促其元差  
勾當官並罷 又詔昨呂惠卿重分畫廊延將兵條約  
等並已施行今差徐禧往環慶路分畫將兵令與逐路  
經略司依詳廊延路所定條約措置如內有事理不同  
及別與惠卿計議事件即具奏聞仍劄與逐路照會  
月



丙寅遺稿二年三月癸未丙戌可考

又詔張山甫就便往亳州按閱見

### 團結訓練諸軍

甲午管勾外都水監丞殿中丞耿琬兼提舉河北淤田

水利司仍自今罷置淤田一司

墨本云自今淤田一司罷置同管勾官今從朱

本

詔麟州星最朗木瓜鋪自熙寧八年以後所耕闢

生地令麟府路軍馬司指揮自今留兩不耕地西人巡

馬悉令依舊處過往并劄下河東路經略司照會仍候

西界再問止作本司已如此施行田牒

乙未詔近差京西南路提點刑獄張復禮督捕蔡州界  
強賊今合諸處兵已多深慮統制不一各務顧避遷延  
致凶黨轉更結集驚擾州縣宜令復禮毋得止在州縣  
行遣文字可速糾率諸處兵甲不以遠近襲捕須令日  
近全火敗獲其如軍校有不用命即行軍法命官械繫  
聽旨仍應干捉賊事並聽復禮指揮

丙申詔張山甫等案閱京東京西將兵其隨行應合用  
弓弩可依殿前呈試斗力打礮弓以分靶為滿弩三石

者加五斗三石五斗加七斗令山甫等親掌之毋得下  
司 上批諸路分樁闕額禁軍請受可令樞密承旨司  
專差吏簿錄其逐路輒支用者論如擅支封樁錢帛法  
詔樞密院引見御龍直出職將虞候三人當補神衛  
都頭以嘗執從物祇應特補天武都頭仍指揮自今應  
執從物人以人材武藝兼選

丁酉詔自今諸酬獎第一等京朝官大小使臣轉一官  
選人判司主簿尉五考初等職官知令錄四考兩使職

官令錄三考支掌防團節察判官并因軍功捕盜不限  
考第並轉合入京朝官及以上資考者循兩資第二  
等減磨勘三年選人循一資與堂除差遣一次軍功捕  
盜轉次等合入京朝官第三等減磨勘二年選人循一  
資第四等免遠免短使免試無可免者各與升一年名  
次第五等各升半年該兩次已上酬獎者與併賞併升  
願留後任收使聽 江浙等路提點坑冶鑄錢公事錢  
昌武言潭州瀏陽縣永興銀場自去年銀銅興發乞下

諸路轉運司應副本司收買銅銀增鑄錢從之仍借支  
湖南上供錢十萬緡候所鑄錢撥還及令司農寺於認  
還內藏庫歲額錢內支那十萬緡專置銀赴京 御史  
黃廉言前歲科場逐經發解人數不均如別試所治詩  
者十取四五治書者纔及其一雖糊名考校務取實藝  
然學者務受經業不容優劣相遠如此乞自今於逐經  
內各取人分數所貴均收所長以專士習詔自今在京  
發解并南省考試詩易各取三分周禮禮記通取二分

又言國子監生員著述論議盡得講官緒餘將來逐官  
例差考試竊恐去取之際或未能判然無疑雖未必私  
徇以亂名實其如參校所長多就已見此蓋人情所不  
能免如此則外方疏遠之人偶不相合遂致黜落甚非  
朝廷兼收博采之意臣愚欲乞將來止選近歲一科人  
為試官或差近郡教授詔候差官日取旨 提點在京  
倉場所言在京諸倉有名額重累者乞改易其延匹永  
濟廣子各第一倉依舊名外欲以延口第二為元豐倉

永濟第二為永豐倉廣積南倉為大盈倉廣濟稅倉為

廣阜倉從之

按延匹延口廣子廣積廣濟倉名前後互異當有訛誤

詔昨西蕃

董戩遣首領朝貢忠款可嘉宜差供奉官郭英齋詔慰諭及賜對衣金帶銀器衣著各三百匹兩令熙河路經略司依治平二年差使臣賜敕告例經略司更送大細法錦五匹大綵五十匹細末茶散茶各五十斤京西第六將言將官李延遇選募兵五百赴唐州桐栢等縣捕賊上批將官捕盜募兵自隨初無明條乃是延遇憚

賊怯懦滋大事勢不惟不足彈治士卒傳聞四方亦足起侮宜特衝替 詔京西遭劫賊殺死保甲人丁及弓

手等可檢例與存恤并勘會諸捕盜并救助之人輕重

傷依條支賜 三司言今具熙寧十年終在京及府界

樁管闕額禁軍請給數目乞免封樁詔在京特依奏

丙申

日上批  
可并此

己亥命權發遣河北轉運判官殿中丞高鑄詣濱棣州界風雨損城壁及害苗稼處照管仍令京東轉運司案



齊州章邱縣官吏如不預備救護致民被水衝注為患  
即劾罪以聞

庚子以右諫議大夫集賢殿修撰張景憲知河陽景憲  
還自瀛洲為上言比年多凶歉百姓積逋負今歲纔小  
登州縣督趣併償道路流言謂其害甚於凶歲願少寬  
假以紓元元上可之下其奏有司時西南蠻犯邊朝廷  
方出師景憲言聖人以天下為度於四夷何所不容今  
小醜跳梁殆邊吏擾之耳且其巢穴險遠若進兵窮討

萬一糧餉不繼則坐困我師邇人先受其弊上曰卿言

是也然朝廷有不得已者

景憲二事朱本止存諫出師正史削去今並存之

初澶州決河復塞呂公著奏疏曰臣伏見昨來澶州曹村埽決潰全河衝注山東聖心惻然即議閉塞奮自獨斷出於羣疑功未踰時而有成患不閱歲而尋弭雖上下竭力遂致澄清實由陛下至誠憂民愛物之心天相神助殆非人力以此見天道聰明日監在下棐忱輔德遒應不遲為人上者可不欽畏恭惟陛下聖德仁厚出

自天性臨下御衆有日月之明天地之量誠非凡庶庸  
妄所能臆度以至近日數起詔獄逮繫頗衆有司極於  
鍛鍊羣下無不震恐比至臨決多從末減昔于公一郡  
之獄吏耳猶以陰德有報光大子孫況以萬乘之尊六  
合之廣布德施恩固宜受福無疆施及萬世然臣願陛  
下雖性得之猶復加聖心焉上奉天下接人加精致誠  
執要行簡道高百王而謙以自牧學貫六藝而虛以受  
人雖威肅羣品不得謂下絕欺誣雖智燭輿情不得謂

事無雍蔽親正士拒壬人必有忍以濟事功惟內恕以  
及人物于以崇起忠厚保合太和則易所謂自天祐之  
吉無不利詩所謂千祿百福子孫千億者蓋將以類而  
應臣以無狀獲備近列竊慕古人將美盡規之義惟陛  
下財幸是月公著入對上迎謂曰覽卿所奏深得近臣  
盡規之義時獄犴寢蕃而上繼嗣未廣公著辭順而意  
切故上深納焉公著因面奏宜增館閣之選曰臣聞濟  
濟多士文王以寧方周之興至於兔置之人有可以當

腹心干城之任者今三館秘閣之職乃朝廷之華選前世以來將相名臣多出其間得人之盛難以遽數臣在皇祐至和中備員館閣當時同輩後亦往往至通顯比年雖有簡拔其數不多其中或以勞進者又皆外補朝廷平日難於收採緩急必乏使令以至近者遣使高麗頗煩聖擇古人有言士不素養無以重國臨事倉卒乃求非以尊朝廷也臣竊以為天下未嘗乏才也求之而後至用之而後知耳臣愚願陛下考合庶言斷自聖見

更得雋偉之士疏通之才稍增館閣之選平日足以優游飭厲緩急惟所用之以重朝廷又論宜寬縣令之制曰臣伏乞審官院流內銓以知縣縣令闕多凡選人被舉充職官及轉京官者例差知縣已被差者不通舉辟不得避免臣竊以為當國家有道之時付之以百里之地有民人社稷之重則士子所宜願為今乃設一切之令強所不欲與坐殿負犯者亡異此殆郡縣法網太密而勸別之道不明更有盡心奉法治行明白者未聞有

所褒異一罹微文則不能自免於譴斥加以近歲朝廷更改法度郡縣之吏或不能奉行故於常法之外峻其黜典經赦去官多不原免積累歲月坐此殿累者益衆臣愚以為長吏之官朝廷宜少寬假非有贓私顯狀及罷軟尤不勝任者雖屬小法無輕替易仍詔諸路監司牧守其所屬令長有奉公愛民治效尤異者每歲別薦三二人間或獎拔待以不次其次如職事修舉有舉主合轉京官者特與依諸州教授例就任改官許令再任

如此則勤廉者得以自保勞能者有所激勸中才足以  
強勉異効不致滯留上深以為然即詔中書立法而法  
竟不就